



Headlines

- प्रधानमंत्री नरेन्द्र मोदी, होर द'उं दिनें दे दौरे पर अज्ज मालदीव पुज्जे जित्थे उ'नें मालदीव्य दे राष्ट्रपति डाक्टर मोहम्मद मुइज्जू हुं'दे कन्नै दपक्खी हितें आहले मामलें पर चर्चा कीती।
- प्रधानमंत्री नरेन्द्र मोदी, दुए सब्भनें शा लम्मी अवधि आहले प्रधानमंत्री बनी गे न ते इस मामले च उ'नें साबका प्रधानमंत्री इंदिरा गांधी होरें'गी पिच्छे छोड़ी दित्ता ऐ।
- संसद च, बरोधी धड़े दे सदस्ये आसेआ बक्ख-बक्ख मामलें गी लेइयै कीते गेदे हंगामे दे चलदे दौनें सदनें दी कार्रवाई गी अज्ज दिन भरै लेई स्थगित करी दित्ता गेआ।
- मुख्मंत्री ओमर अब्दुल्ला होरें जम्मू-कश्मीर च इमारतें ते होरनें निर्माण कम्में कन्नै जुडे दे कम्मगारें दे कल्याण सरबन्धी बोर्ड दी बैठक दी प्रधानता कीती।
- श्री अमरनाथ जी दी पवित्तर छड़ी मुबारक दा पूजन समारोह अज्ज श्रीनगर दे पवित्तर श्री शारीका देवी मंदरै च आयोजित कीता गेआ।



PM-Maldives Visit

प्रधानमंत्री नरेन्द्र मोदी, ब्रिटेन दी अपनी कामयाब जात्तरा पूरी करने परैन्त द'उं दिनें दे दौरे तैहत अज्ज मालदीव पुज्जे जित्थे वेलाना अंतर्राष्ट्री ब्हाई अड्डे पुज्जने पर मालदीव्स दे राष्ट्रपति डाक्टर मोहम्मद मुइज्जू होरें श्री मोदी हुं'दा सोआगत कीता। प्रधानमंत्री मोदी होरें'गी गार्ड ऑफ ऑनर कन्नै सम्मानित कीता गेआ ते 21एं तोपें दी सलामी बी दित्ती गेई। स्वागत समारोह च मालदीव दे बच्चें सांस्कृतिक कार्यक्रम पेश कीते। मुइज्जू होरें बदेश मंत्री सुब्रह्मण्यषम जयशंकर, राश्ट्री सुरक्षा सलाहकार अजीत डोभाल, बदेश सचिव विक्रम मिस्त्री ते होरनें भारती अधिकारियें कन्नै मलाटी कीती। मगरा प्रधानमंत्री नरेन्द्र मोदी होरें डाक्टर मुइज्जू हुं'दे कन्नै दपक्खी हितें आहले केई मामलें पर चर्चा कीती ते व्यापक आर्थिक ते समुंदरी सुरक्षा सांझ-भ्याली च हासल प्रगति दी सांझे तौर पर समीक्षा बी कीती। प्रधानमंत्री नरेन्द्र मोदी हुं'दी मालदीव दी एहू त्रीऽ जात्तरा ऐ।



PM 2nd Longest Team

प्रधानमंत्री नरेन्द्र मोदी, देसै दे इतिहास च इक बड्डी उपलब्धि हासल करदे होई दुए सब्भनें शा लम्मी अवधि आहले प्रधानमंत्री बनी गे न जेहडे लगातार प्रधानमंत्री दे औहद्धे पर काबज़ रेइये देसै दी कमान सांभा करदे ना। श्री मोदी होरें इस मामले च साबका प्रधानमंत्री इंदिरा गांधी होरें'गी पिच्छे छोड़ी दित्ता ऐ। एहू उपलब्धि हासल

करने आहले ओहू पैहले गैर-कांग्रेसी प्रधानमंत्री बी हैन। नरेन्द्र मोदी होर, ऐसे पैहले प्रधानमंत्री बी हैन जिं'दा जरम आजाद भारत च होआ ते जेहडे गैर-हिंदी राज्य दे बसनीक हुं'दे होई सब्भनें शा लम्मी अवधि तोहडी देसै दे प्रधानमंत्री दे औहद्वे पर बने दे ना। 74एं ब'रें दे नरेन्द्र मोदी होरें 26 मई 2014 गी पैहली बारी भारत दे प्रधानमंत्री दे तौर पर संगंध चुक्री ही ते अज्ज इस औहद्वे पर उ'नेंगी लगातार 11एं ब'रें ते 60एं ध्याड़े पूरे होई गे ना। साबका प्रधानमंत्री इंदिरा गांधी होर लगातार 11 ब'रे ते 59 ध्याड़ें तोहडी इस औहद्वे पर रेइयां हि'आं। उ'आं सब्भनें शा मते चिरै तोहडी, लगातार भारत दे प्रधानमंत्री दे औहद्वे पर बने दे रौहने दा रिकार्ड साबका प्रधानमंत्री पंडित जवाहर लाल नेहरू हुं'दे नांऽ ऐ जेहडे लगातार 16 ब'रे ते 286 ध्याड़े इस औहद्वे पर बने दे रेहू हे। प्रधानमंत्री नरेन्द्र मोदी हुं'दी इस उपलब्धि पर मीडिया कन्नै बचार सांझे करदे होई बीजेपी सांसद अपराजिता सारंगी होरें आखेआ

<><><><><><>

Parl-Adjoured

सांसद च, बरोधी धड़े दे सदस्यें आसेआ बक्ख-बक्ख मामलें गी लेइयै कीते गेदे हंगामे दे चलदे दौनें सदनें दी कार्रवाई गी अज्ज दिन भरै लेई स्थगित करी दित्ता गेआ। पैहली बारी स्थगित होने परैन्त जिसलै लोकसभा दी बैठक दपैह्नी 2 बजे परतियै शुरु होई तां इक बारी फही बरोधी धड़े दे सदस्यें डंड-रौली पानी शुरु करी दित्ती जेहदे चलदे सदन दी कार्रवाई गी स्थगित करना पेई गेआ। भारती जनता पार्टी दे सांसद ते पीठासीन अधिकारी जगदम्बिका पॉल होरें बरोधी सदस्यें गी गुजारिश कीती जे ओहू अपनी सीटें पर जाइयै ब्हेई जान ते सदन दे कम्मकाज गी बवस्थित ढंगै'नै चलन देन पर एहदे बावजूद बरोधी सदस्यें हंगामा जारी रक्खेआ जेहदे चलदे सदन दी कार्रवाई गी पूरे दिनै लेई स्थगित करी दित्ता गेआ। दुई बक्खी राज्यसभा च बी इससै चाल्ली दी स्थिति बनी दी रेई। बरोधी सदस्यें दे हंगामे करी राज्यसभा दी कार्रवाई गी पैहले दपैह्नी 12 बजे तोहडी ते मगरा दिन भरै लेई स्थगित करी दित्ता गेआ।

<><><><><><>

LS-APM

लोकसभा दे स्पीकर ओम बिरला होरें अज्ज सब्बै पार्टियों दे नेताएं कन्नै सर्वदलीय बैठक लाई तां जे इससलै चला' रदे बरसांती आहले सत्र दरान सदन दी कार्रवाई बवस्थित ढंगे नै चलाना यकीनी बनाया जाई सकै। बैठक दरान सब्भनें सहमति जताई जे संगारें थमां सदन दी कार्रवाई गी बवस्थित ढंगै सिर चलाया जा। बिरला होरें जोर देइयै आखेआ जे प्रश्नकाल दरान चर्चा च कुसै बी चाल्ली दा कोई विघ्न नेई औन चाहिदा। बैठक च बीजेपी, कांग्रेस, समाजवादी पार्टी, जेडीयू (यू) ते टीएमसी सने होरनें पार्टियों दे सदस्यें हिस्सा लैता।

<><><><><><>

Prog. Announcement

आकाशवाणी जम्मू दे क्षेत्रीय समाचार एकांश आसेआ कल 26में कारगिल विजय दिवस दे मौके पर दपैह्नी साढे 12 बजे 30एं मिंटें दे इक बशेश कार्यक्रम दा प्रसारण कीता जाहगा। इस कार्यक्रम च साढे परौहने होडन ब्रिगेडियर

(सेवानिवृत्त) विजय सागर धीमान ते उं'दे कन्नै गल्लबात करडन साढी न्यूज एन्कर श्रुति खजूरिया। आकाशवाणी जम्मू दे क्षेत्रीय समाचार एकांश आसेआ पेश कीते जाने आहले कार्यक्रमें गी तुस मीडिया वेव 303 मीटर यानि 990 किलोहर्ट्ज ते एफएम 100 इशारिया 3 पर सुनी सकदे ओ।

<><><><><><>

CM-BOCWWB Meeting

मुख्यमंत्री उमर अब्दुल्ला होरें अज्ज जम्मू-कश्मीर कल्याण बोर्ड दी बैठक दी अध्यक्षता कीती ते मजदूरें ते उन्दे परौआर आहलें दी भलाई-बेहतरी आस्तै कीते जारदे जतनें दी सराहना बी कीती। मुख्यमंत्री होरें जोर देइयै आखेआ जे सब्भनें मजदूरें लेई स्थूलतां सिद्धे तौरा पर उपलब्ध करोआना यकीनी बनाया जा। उनें मुतल्लका अधिकारियें गी निर्देश दित्ते जे इस गल्लै गी यकीनी कीता जा जे कोई बी योग्य मजदूर अपने हक्कै थमां बंछित नेई रेई जा। इस मौके पर उपमुख्यमंत्री सुरिंद्र चौधरी बी उत्थे मौजूद हे।

<><><><><><>

Chhari-Mubarakh

छड़ी मुबारक श्री अमरनाथ जी जात्तरा प्रबंधन नै अज्ज श्रीनगर दे पवित्तर श्री शारिका देवी मंदरै च पूजन समारोह दा आयोजन कीता। महंत दिवेन्द्र गिरी जी होरनें साधु-संतें कन्नै रलियै मंदरै च पारम्परिक रीतां कीतियां जेड़ियां सालाना श्री अमरनाथ जी जात्तरा कन्नै प्राचीन समें थमां चला आ करदियां न। इस मौके पर बड़ी बद्द गिनतरी च श्रद्धालुएं किट्टे होइयै भक्तिभाव ते बडे मते उत्साह कन्नै समारोह च हिस्सा लैत्ता। इस मीडिया आहलें कन्नै गल्ल करदे होई महंत दिवेन्द्र गिरी होरें आखेआ।

<><><><><><>

DC-Rajouri Review

राजौरी दे डिप्टी कमिशनर अभिषेक शर्मा होरें औंदी श्री बुड्ढा अमरनाथ जी दी जात्तरा दी तैयारियें दी समीक्षा कीती ते जात्तरा मेदान च जाइयै व्यापक जायजा लैता। दौरे दरान डी.सी होरें पार्किंग दी सुविधा, मेडिकल अमले दी तैनाती, पीने आहले पानी दी उपलब्धता, सुरक्षा, साफ-सफाई, रौहने-बौहने दा इंतजाम ते होर जरूरी सेवाएं दा तफसीली जायजा लैता। इस दरान उनें जात्तरा कमेटी दे सदस्यें कन्नै बी मलाटी कीती। एहदे अलावा डी.सी होरें सब्भनें मुतल्लका अफसरें गी हिदायत दित्ती जे ओहू रौहने-बौहने आहले केंद्रें च आयुष माहिरें दी तैनाती यकीनी करन तां जे श्रद्धालुएं गी बुनियादी सेवां प्रदान कीतियां जाई सकन। इस बारै होर जानकारी दिंदे होई राजौरी दे डिप्टी कमिशनर अभिषेक शर्मा होरें आखेआ।

<><><><><><>

Kishtwar-Interaction

सरकारी डिग्री कौलेज किशतवाड़ दी एनसीसी यूनिट आसेआ अज्ज गल्लबात आहले कार्यक्रम दा सरिस्ता कीता गेआ जेदे च विद्यार्थियें मेजर अक्षय हुंदे कन्नै गल्लबात कीती। इस कार्यक्रम दा मकसद भारती फौजी दी निष्ठा, देसै लेई समर्पणभाव ते एहदी रक्षा आस्तै म्हेशां तत्पर रौहने आहली भावना बारै विद्यार्थियें गी जानकार बनाना हा। इस मौके पर बोलदे होई अक्षय होरें विद्यार्थियें कन्नै अपना तजुर्बा सांझा कीता ते इक फौजी दे जीवन दे

संघर्ष बारै दस्सेआ। एहदे अलावा देसै लेई अपनियां सेवां देने लेई उनें विद्यार्थिं दे दा दिल बी बधाय। इस सत्र च तकरीबन 50 शा बद्द विद्यार्थियें हिस्सा लैता। इस मौके पर बोलदे होई इक एनसीसी कैडेट नै आखेआ।

<><><><><><>

DIPR-Competitions

स्वतंत्रता दिवस-2025 समारोहें दे हिस्से दे रूपै च जम्मू-कश्मीर सूचना ते जनसंपर्क मैहकमे नै देशभक्ति दी भावना गी बढावा देने दे मकसद कन्नै त्रै ऑनलाइन प्रतियोगितां शुरू कीतियां न, विशेष तौरा पर विद्यार्थियें ते नौजवानें आस्तै। इनें प्रतियोगिताएं च राष्ट्र गान गायन, “विकसित भारत @2047” विशे आहली इक निबंध लेखन मुकाबला ते ‘ड्रा योर फेवरिट फ्रीडम फाइटर’ शीर्षक कन्नै इक पेंटिंग मुकाबला शामिल ऐ। प्रतिभागी अपनी प्रविष्टियां, दरखास्तां आनलाइन जमा कराई सकदे न। प्रतियोगिताएं दे विजेताएं गी नगद ईनाम ते प्रमाण पत्र थ्होडन। सूचना ते जनसंपर्क मैहकमे नै नगारिकें गी इनें प्रतियोगिताएं कन्नै उत्साह कन्नै जुडने ते अपनी अवाज, दृष्टिकोण ते रचनात्मकता दा प्रदर्शन करियै इस स्वतंत्रता दिवस गी इक यादगार मौका बनान। इस बारै पूरी जानकारी मैहकमे दी आधिकारिक वेबसाइट पर उपलब्ध ऐ।

<><><><><><>